



Vogošća, ul. Jošanička br. 80, tel: 00387 33 586 412, 586-407

Broj: 12-04-sl./25

Vogošća, 28.11.2025. godine

VIJEĆNIČKA PITANJA
POSTAVLJENA NA 12. REDOVNOJ SJEDNICI OPĆINSKOG VIJEĆA VOGOŠĆA
održanoj 27.11.2025. godine

Na 12. redovnoj sjednici Općinskog vijeća vijećnik **Handžić Jasmin (u ime Kluba vijećnika SDA)** postavio je slijedeća vijećnička pitanja:

- 12/1.** Obzirom da je Općinsko vijeće Vogošća usvojilo Rjesenje o utvrđivanju Javnog interesa za izvođenje radova na izgradnji vodovodne mreže u naseljima Krivoglavci-Svrake i Poturovići, moje pitanje glasi: u kojoj je fazi realizacija projekta, tj. trajnog rješavanja problema vodosnadbjevanja naselja Krivoglavci - Svrake i naselja Poturovići. Molim da mi se dostavi detaljna informacija u pisanoj formi.
- 12/2.** Uposlenici KJKP "Vodovod i kanalizacija" d.o.o. Sarajevo u ul. Gornja Jošanica I., izvršili su kontrolu kanalizacionih priključaka i sačinili Zapisnike o neovlaštenom korištenju komunalne usluge uz konstataciju da su se građani navedene ulice sami priključili na kanalizacionu mrežu bez saglasnosti KJKP "Vodovod i kanalizacija" d.o.o. Sarajevo. Ujedno pored Zapisnika o neovlaštenom korištenju komunalne usluge stanovnicima ulice Gornja Jošanica I ispostavljene su i profakture za plaćanje kanalizacione mreže. Obzirom da ja imam informacije da građani ulice Gornja Jošanica I nisu samostalno izvršili priključke na kanalizacionu mrežu moje pitanje glasi: da li se i ko je realizovao projekat izgradnje separatne kanalizacione mreže u Gornjoj Josanici I, u kom periodu, te ukoliko je realizovan projekat, koja firma je izvodila predmete radove. Da li je izvršen nadzor nad izvođenju radova na kućnim priključcima i ko je isti pratio. Iz kojeg razloga građani navedene ulice nisu uvedeni u sistem naplate odvodnje i na šta se odnose predmetne profakture.

Vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

- 12/3.** Obraćam se nadležnoj općinskoj službi s ciljem dobivanja informacije o neadekvatnom čišćenju ulica, trotoara i pješačkih zona nakon sniježnih padavina na području općine Vogošća. Naime, gotovo svake godine ulice koje se nalaze van centralnog dijela općine, a nisu glavne saobraćajnice, ostaju neprohodne. Isto je vidljivo i na početku zimske sezone 2025/2026. Glavne ulice se ne čiste blagovremeno, trotoari i pješačke zone ostaju zapušteni, dok pojedine ulice uopće nisu očišćene, čime se ugrožava bezbjedno kretanje građana. Kao primjer navodim ulicu Uglješići, u koju nakon padavina nikada nije ušlo vozilo za čišćenje snijega. Prema informacijama građana, slična situacija prisutna je i u drugim naseljima općine. Posebno zabrinjava činjenica da u navedenoj ulici žive žene iz Srebrenice, koje su izgubile članove porodice i nemaju pomoć pri čišćenju. One nisu u mogućnosti otići do prodavnice ili ljekara, niti im se može prići motornim vozilima radi pružanja pomoći. Prošle godine održavanje je bilo na zadovoljavajućem nivou - firma koja je bila angažovana redovno je čistila snijeg, a ulica je bila prohodna u svako doba dana i noći. Također, u ranijim godinama neki privrednici su traktorima redovno čistili snijeg u ovim ulicama, što je građanima olakšavalo svakodnevni život. Ove godine, međutim, stariji građani i žene sami uklanjaju snijeg lopatama, što podsjeća na praksu iz prošlog vijeka. Potrebno je da mi se odgovori na sljedeće:
- Zašto se dešava, da neke firme uredno i redovno održavaju puteve, dok druge to ne čine kada dobiju isti posao za čišćenje snijega.

- Ko vrši monitoring nad izvođenjem radova čišćenja i održavanja puteva na području općine Vogošća.
- Na osnovu čega se isplaćuju budžetska sredstva za čišćenje ulica, ako su građani nezadovoljni kvalitetom usluge.
- Zašto se ne razmatra prekid ugovora sa firmama koje ne izvršavaju svoje ugovorene obaveze, niti se iste stavljaju na tzv. „Crnu listu” pri raspisivanju javnih poziva za dodjelu ugovora za posao.

Molim da mi dostavite zvanične informacije i mjere koje će se poduzeti kako bi se navedeni problemi riješili u interesu građana.

12/4. Postavljam pitanje prema nadležnoj općinskoj službi, građani ulice Ahmeda Rizve pitaju da li je i kada planirana podjela kanti za smeće u navedenoj ulici. Kante za smeće su se pokazale kao pragmatičan način odlaganja i odvoza smeća koja nastaju u domaćinstvima, te je potrebno da nam nadležna služba odgovori na navedeno pitanje kako bi građani bili blagovremeno informisani.

Vijećnica **Karović Amra (u ime Kluba vijećnika SDP)** postavila je slijedeće vijećničko pitanje:

12/5. Postoji li drugo mjesto koje bi služilo za odlaganje građevinskog materijala, u ovom slučaju velikih količina pjeska koji se nalazi na ulazu u Vogošću.

Obrazloženje:

Obzirom da se pomenuti pjesak, šljunak nalazi na samom ulazu u grad, vrlo je neugledno. Također, smanjuje vidik i sužava prostor prilikom vožnje u saobraćaju. Djeluje kao kamenolom i odvlači pažnju, te jednostavno nije lijepo, a ni prikladno mjesto za takve stvari.

Vijećnik **Bogilović Enis (u ime Kluba vijećnika NiP)** postavio je slijedeće vijećničko pitanje:

12/6. Dokle se došlo sa izgradnjom kružnog toka na Kobiljoj Glavi.

Vijećnica **Salčin Sabiha (u ime Kluba vijećnika SDA)** postavila je slijedeće vijećničko pitanje:

12/7. Postavljam pitanje prema Crvenom križu Kantona Sarajevo, da li se u narednom periodu planira rekonstrukcija i obnova dječjeg odmarališta Crvenog križa Kantona Sarajevo, koje se nalazi na području općine Vogošća.

Obrazloženje:

Pošto se navedeni objekat nalazi u jako lošem stanju upućujem pitanje prema Crvenom križu Kantona Sarajevo, da li se u narednom periodu planira rekonstrukcija i obnova dječjeg odmarališta Crvenog križa Kantona Sarajevo, koje se nalazi na području općine Vogošća, tj. da li se planira:

- Sanacija i modernizacija objekta, radi poboljšanja sigurnosti i funkcionalnosti.
- Nabavka novog mobilijara za dječije igralište kako bi se djeci osigurao kvalitetan i siguran prostor za igru.
- Uređenje vanjskog prostora (zelene površine, staze, rasvjeta) radi stvaranja ugodnog ambijenta za boravak djece i organizaciju edukativnih i rekreativnih sadržaja.

Molim da se dostavi informacija da li postoje planovi ili projekti za navedene aktivnosti.

Vijećnik **Mehić Almedin (u ime Kluba vijećnika SDA)** postavio je slijedeće vijećničko pitanje:

12/8. Postavljam pitanje prema nadležnim, u kojoj je fazi podjela kanti za otpad za naselja Semizovac i Svrake. Ako je počela podjela, molim da mi kažete u kojoj je fazi i kada se planira kompletirati podjela za sve korisnike.

Vijećnik **Škoro Hamdija (u ime Kluba vijećnika Naprijed BiH)** postavio je slijedeća vijećnička pitanja:

12/9. U ime korisnika grijanja Bags Energothenika u zanatskom centru, koji se nalazi preko puta Općine Vogošća, postavljam pitanje zašto isti nemaju isporuku toplotne energije, iako redovno izmiruju svoje obaveze. Već duže vrijeme pomenuti korisnici prinuđeni su da traže alternativna grijanja zbog neisporuke toplotne energije.

12/10. Obzirom da nisam zadovoljan odgovorom nadležne službe na vijećničko pitanje 11/10., a koje se tiče parking prostora odnosno zakupa javnih parking mjesta od strane pravnih lica, kao i da sam u svom pitanju jasno tražio odgovore, a da sam kao primjer samo naveo jednu lokaciju. Obzirom da je nadležna služba odgovorila da je udovoljeno, jer se radi o zdravstvenoj ustanovi, a po saznanjima koja imam baš u tom dijelu postoji još nekoliko zdravstvenih ustanova čiji je zahtjev odbijen, molim nadležnu službu da ponovo odgovori na moje pitanje sa svim relevantnim i traženim odgovorima. Kako i na koji način se javna parking mjesta u vlasništvu Općine Vogošća mogu dati u zakup pravnim ili fizičkim licima. Po kojim kriterijima i zakonskim osnovama ili nekim drugim se daju ista, obzirom da imam informaciju da neki mogu koristiti, a neki ne. Pored toga, dobio sam informaciju da su i njihovi zahtjevi da se postavi znak X zabrane parkiranja, da bi se nesmetano moglo ući u njihove objekte u kojima obavljaju svoje djelatnosti koje građani koriste, odbijeni. Molim da mi se odmah odgovori kako jedni mogu i već godinama koriste parking prostor, a drugi ne mogu i njihovi zahtjevi se odbijaju.

Vijećnik **Pašagić Almir (u ime Kluba vijećnika SDP)** postavio je slijedeća vijećnička pitanja:

12/11. Postavljam pitanje Općini Vogošća i Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo koje glasi:

1. Koliko privatnih i stambenih objekata na području općine Vogošća je evidentirano kao bespravno izgrađeni.
2. Koja je trenutna dinamika i status procesa njihove legalizacije. (Molim da se dostave podaci o broju zaprimljenih zahtjeva za legalizaciju, broju riješenih predmeta, predmetima u postupku, kao i planiranim aktivnostima nadležnih službi.)

Molim da mi se odgovor dostavi u zakonskom roku u pisanoj formi.

12/12. Postavljam pitanje Općini Vogošća, Ministarstvu za odgoj i obrazovanje Kantona Sarajevo i JU Osnovnoj muzičkoj školi "Mladen Pozajić" Sarajevo, koje glasi: Da li postoji mogućnost da se područno odjeljenje Osnovne muzičke škole "Mladen Pozajić" u Vogošći nazove po našem legendarnom estradnom umjetniku Halidu Bešliću, koji je nedavno preminuo.

Obrazloženje

Ideja da se područno odjeljenje Osnovne muzičke škole "Mladen Pozajić" u Vogošći nazove po Halidu Bešliću proizlazi iz dubokog poštovanja građana prema njegovom životnom i umjetničkom djelu. Halid Bešlić bio je umjetnik čiji je rad ostavio neizbrisiv trag u bosanskohercegovačkoj kulturi, a njegove pjesme obilježile su generacije i postale dio zajedničkog identiteta našeg društva. Osim izuzetnog doprinosa muzičkoj sceni, Halid Bešlić bio je poznat po svojoj skromnosti, humanosti i spremnosti da pomogne svakome kome je pomoć bila potrebna. Posebno je važno naglasiti da je Halid Bešlić bio dugogodišnji stanovnik Općine Vogošća, gdje je kroz svoj rad i društveno angažovanje ostavio veliki trag. Građani Vogošće s ponosom ističu da je Halid bio "jedan od nas" — neko ko je svojom dobrotom, prisutnošću i pristupačnošću doprinio razvoju zajedništva i pozitivnih vrijednosti. Nazivanje područnog odjeljenja Osnovne muzičke škole u vogošći njegovim imenom predstavljalo bi trajno priznanje njegovom umjetničkom naslijeđu, ali i snažnu poruku mladim generacijama o važnosti njegovanja kulture, humanosti i lokalnog identiteta. Time bismo podstakli učenike da rastu uz primjer čovjeka koji je svojim talentom, ali prije svega dobrotom, postao jedan od najvoljenijih umjetnika našeg vremena. Molim da se dostavi informacija o procedurama, uslovima i mogućim narednim koracima u vezi s realizacijom ovog pitanja.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

12/13. U kojoj se konkretnoj fazi trenutno nalazi izrada Odluke o komunalnom redu.

Obrazloženje:

Na prethodnim sjednicama Općinskog vijeća uputio sam inicijativu za izradu i donošenje Odluke o komunalnom redu, s ciljem sveobuhvatnog uređenja ove oblasti i omogućavanja efikasnijeg inspekcijaskog nadzora na području općine Vogošća. Tom prilikom sam dobio odgovor da je nadležna općinska služba započela aktivnosti na pripremi navedene Odluke. Molim da mi se dostavi informacija:

1. U kojoj se konkretnoj fazi trenutno nalazi izrada Odluke o komunalnom redu.
2. Koje su dosada provedene aktivnosti i šta je preostalo do finalizacije nacрта.
3. Kada se može očekivati upućivanje ove odluke u dalju proceduru pred Općinsko vijeće.

- 12/14.** Da li će nadležna služba pristupiti pokretanju procesa izrade Odluke o viziji razvoja mjesnih zajednica Općine Vogošća, odnosno Operativnog plana za period 2026–2029. godine, te ukoliko hoće – kada se može očekivati početak izrade ovih dokumenata.

Obrazloženje:

Na prethodnoj sjednici Općinskog vijeća uputio sam vijećničku inicijativu kojom sam tražio izradu Odluke o viziji razvoja mjesnih zajednica Općine Vogošća, kao i izradu Operativnog plana za period 2026–2029. godine. Međutim, odgovor koji sam zaprimio na ovu inicijativu nije mi bio u potpunosti jasan u pogledu konkretnih koraka koje nadležna služba planira preduzeti, niti je precizirano da li će proces izrade navedenih dokumenata zaista biti pokrenut. Imajući u vidu značaj mjesnih zajednica kao osnovnog oblika učešća građana u lokalnoj samoupravi, te činjenicu da je prethodni Operativni plan istekao, smatram važnim da Općinsko vijeće dobije jasnu informaciju o daljnjim aktivnostima. Općina Vogošća kao partner projekta “Jačanje uloge mjesnih zajednica u BiH”, bila je u obavezi da izradi Odluku o viziji razvoja mjesnih zajednica čiji je sastavni dio Operativni plan za period 2023.-2025. godina, kako bi mogla povlačiti finansijska sredstva za realizaciju Operativnog plana. Projekat “Jačanje uloge mjesnih zajednica u BiH” je završen u septembru 2025. godine da li to znači da Operativni plan za naredni period neće biti realizovan.

Vijećnik **Piknjač Admir (u ime Kluba vijećnika NiP)** postavio je slijedeće vijećničko pitanje:

- 12/15.** Na jednoj od ranijih sjednica Općinskog vijeća Vogošća prezentovana je i usvojena inicijativa nadležne općinske službe za opravdanost i izgradnju solarnih panela na zgradi Općine Vogošća. Iako je inicijativa jednoglasno dobila podršku od svih izabranih vijećnika, odnosno Vijeća i time postala obaveza za dalje postupanje nadležnih službi, do danas njen sadržaj odnosno projekat nije realizovan ili barem nismo upoznati o realizaciji istog. S tim u vezi, tražim od nadležne općinske službe da mi odgovori na pitanje zašto projekat postavljanja solarnih panela na zgradu Općine Vogošća nije realizovan i koji su razlozi zbog kojih nije realizovan.

Obrazloženje:

Razlog jednoglasnog prihvatanja pomenute inicijative od strane nas vijećnika za postavljanje solarnih panela na krov zgrade naše Općine, a također i na ostale javne ustanove kojim rukovodi Općina Vogošća i čiji je osnivač, bio je značaj energetske efikasnosti, smanjenje troškova električne energije, kao i primjena savremenih ekoloških standarda u radu lokalne uprave, kako je i prezentovano. Smatram da je neophodno da se utvrdi razlog zbog čega nije došlo do realizacije ovog važnog projekta, te da nam se dostave relevantne informacije, čak smatram da smo planirali i određena budžetska sredstva za realizaciju ovog projekta. Ukoliko je projekat realizovan, dužni ste bili da nas obavijestite o realizaciji istog.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25
Vogošća, 28.11.2025.godine

INICIJATIVE POKRENUTE
NA 12. REDOVNOJ SJEDNICI OPĆINSKOG VIJEĆA VOGOŠĆA
održanoj 27.11.2025. godine

Na 12. redovnoj sjednici Općinskog vijeća vijećnik **Handžić Jasmin (u ime Kluba vijećnika SDA)** pokrenuo je slijedeće inicijative:

12/1. Pokrećem inicijativu za uređenje i modernizaciju sportskih ploha ispred obrazovnih ustanova.

Obrazloženje:

Školska dvorišta i sportske plohe u okviru školskog dvorišta predstavljaju ključni prostor za svakodnevne aktivnosti djece, razvoj motoričkih sposobnosti, timskog duha i zdravih životnih navika. Nažalost, u velikom broju osnovnih škola u Kantonu Sarajevo, pa time i općini Vogošća sportske plohe su zapuštene, oštećene, bez moderne opreme ili bez odgovarajuće podloge, što ugrožava sigurnost učenika i ograničava kvalitet nastave tjelesnog odgoja. Shodno svemu navedenom, predlažem da nadležno Ministarstvo u saradnji sa općinama i upravama škola:

- Pokrene izradu kantonalnog programa za obnovu i opremanje školskih sportskih ploha (igrališta, terena, multifunkcionalnih prostora)
- Prioritizira škole koje nemaju sigurnu i funkcionalnu sportsku infrastrukturu
- Osigura sredstva iz budžeta Ministarstva i/ili kroz zajedničko sufinansiranje s općinama
- Uključi savremenu sportsku opremu, gumirane podloge, mini tribine i rasvjetu za sigurno korištenje prostora i van školskih sati.
- Omogući pristup zajednici (djeci i mladima iz naselja) uz nadzor i poštivanje pravila korištenja.

U skladu sa svim navedenim, predlažem da Ministarstvo za odgoj i obrazovanje Kantona Sarajevo pokrene izradu i provedbu Programa uređenja sportskih ploha ispred osnovnih i srednjih škola u Kantonu Sarajevo za period 2025–2028.godina sa jasno definisanim prioritetima, rokovima i budžetom.

12/2. Pokrećem inicijativu za uređenje pitanja koja se odnose na održavanje autobuskih stajališta na području općine Vogošća.

Obrazloženje:

Obzirom da pitanje održavanja autobuskih stajališta na području općine Vogošća nije adekvatno riješeno, odnosno da u praksi imamo vrlo zapuštena autobuska stajališta, smatram da je potrebno opet pokrenuti ovo pitanje do njegovog konačnog rješavanja. Napominjem da je ovo pitanje već pokretano kroz rad Općinskog vijeća Vogošća, a i kroz rasprave po dostavljenim informacijama javnih preduzeća i prijevoznika, ali do danas nemamo uredna autobuska stajališta na području općine Vogošća, mada nema niti jedan opravdan razlog da takva ne budu. Ovim putem tražim da se putem Općinskog vijeća i općinskih službi ova vijećnička inicijativa dostavi višim nivoima vlasti od kojih očekujemo da istu razmotre i kroz nadležnosti urede. Sadašnje stanje na žalost nije prihvatljivo.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

- 12/3.** Pokrećem inicijativu prema nadležnoj općinskoj službi, za unaprjeđenje ostvarivanja prava na dječiji dodatak za višečlane porodice „tri plus” djece.

Obrazloženje:

Na osnovu važećeg Zakona o socijalnoj zaštiti, porodicama sa troje i više djece omogućeno je ostvarivanje prava na dječiji dodatak, bez obzira na njihove materijalne prilike i prihode. Navedeni Zakon je donesen s ciljem poticanja pronatalitetne politike i podrške višečlanim porodicama, kako bi se dao poticaj natalitetu. Međutim, u praksi se ovo zakonsko pravo tumači restriktivno. Naime, kada jedno od troje djece izgubi pravo na dječiji dodatak (npr. zbog navršene starosne dobi), istovremeno pravo na dječiji dodatak gube i ostala djeca tih porodica, pozivajući se na formalno smanjenje broja djece u pravu. Roditelji u takvim slučajevima od nadležnih socijalnih službi dobijaju odbijenice za dječiji dodatak i ako formalno pripadaju pronatalitetnim porodicama „tri plus” djece. Zbog navedenog, pokrećem inicijativu da se bez obzira na to da li je jedno ili više djece izašlo iz prava za dječiji dodatak, isti dodijeli svakom djetetu ponaosob, a koje potiče iz porodice „tri plus” djece. Usvajanje ove inicijative je nužno, kako bi se spriječio diskriminatorski odnos prema djeci koja formalno potiču iz tzv. „tri plus” djece, a tumačenjem Zakona im se ukida to pravo. Dosadašnja praksa pokazuje da mnoge višečlane porodice, nakon gubitka formalnog prava na dječiji dodatak jednog ili više djece, ostaju bez ikakve podrške, čime se narušava osnovna svrha podrške pronatalitetnim porodicama. Stoga je potrebno usvajanje ove inicijative, kako bi se osiguralo dosljednije i pravednije ostvarivanje prava za poticaj pronatalitetnim porodicama.

- 12/4.** Pokrećem inicijativu prema nadležnoj općinskoj službi da se izvrši dodjela stipendija učenicima koji se obrazuju za zanat.

Obrazloženje:

Obzirom na izražen deficit radne snage, posebno kvalifikovanih zanatlija u oblastima građevinarstva, metalske, drvne i tekstilne industrije, gastronomije i ugostiteljstva, privrednici se suočavaju sa značajnim poteškoćama u obezbjeđivanju potrebnih kadrova. Kako bismo poticajno djelovali na prevazilaženje navedenog problema, a imajući u vidu sve manji interes mladih za zanatska zanimanja, pokrećem inicijativu za stipendiranje većeg broja učenika koji se opredjeljuju za školovanje u navedenim oblastima. Obezbeđivanjem većeg broja stipendija u ovim oblastima želimo pružiti podršku obrazovanju kadrova iz zanatstva, te na taj način doprinijeti osposobljavanju većeg broja kvalifikovanih radnika i unapređenju tržišta rada.

Vijećnik **Cvrk Ćamil (u ime Kluba vijećnika DF)** pokrenuo je slijedeću inicijativu:

- 12/5.** Pokrećem inicijativu prema Ministarstvu obrazovanja Kantona Sarajevo za rekonstrukciju i zamjenu ograde oko vrtića Trešnjica u Vogošći.

Obrazloženje:

Kao roditelj čije dijete boravi u vrtiću Trešnjica imam obavezu da u svoje ime i u ime ostalih roditelja čija djeca borave u vrtiću Trešnjica tražim od Ministarstva obrazovanja Kantona Sarajevo osiguranje sredstava za renoviranje i zamjenu ograde oko vrtića kao i za postavljanje video nadzora u dvorištu vrtića. Postojeća ograda je u znatnoj mjeri dotrajala i oštećena i kao takva predstavlja potencijalnu opasnost za djecu koja borave u vrtiću. Ako znamo da ovdje borave djeca uzrasta od dvije do pet godina onda možemo pretpostaviti u kojoj mjeri je oštećena i zahrđala ograda opasnost po djecu u vrtiću. Ulazne kapije su u lošem stanju, nemaju mogućnost zaključavanja, tako da u dvorište vrtića može ući svako i u svako doba dana. Na zapadnoj strani se nalaze veliki borovi koji su, prema neprovjerenim informacijama, stjecište osoba koje konzumiraju opojna sredstva. Sama činjenica da se takva lica okupljaju u blizini vrtića i da se u dvorište vrtića ubacuju razni otpatci dovoljna je da se roditelji zabrinu za sigurnost djece. Visina ograde oko vrtića, a pogotovo na toj zapadnoj strani je nedovoljna da bi se onemogućio ulazak stranih lica u dvorište vrtića. Zbog svega ovoga, smatramo da se moraju preduzeti sljedeće radnje:

1. Na kritičnim dijelovima podići visinu ograde na minimalno dva metra kako bi bio onemogućen prelazak ograde stranim licima.
2. Na ostalim dijelovima ograde zamijeniti oštećene segmente.
3. Prefarbati kompletnu ogradu.
4. Postaviti nove kapije koje bi se mogle zaključavati nakon završetka radnog vremena vrtića.
5. Postaviti video nadzor u kritičnim zonama i na ulazu u vrtić.

Za sve eventualne probleme koji nastanu kao posljedica gore navedenih nedostataka, mi roditelji smatraćemo direktno odgovornim nadležno ministarstvo.

Vijećnica **Karović Amra (u ime Kluba vijećnika SDP)** pokrenula je slijedeću inicijativu:

12/6. Pokrećem inicijativu da se postavi branik ili zaštitna ograda na kratkom kraku ulice koja spaja Rosulje I i ul. Skendera Kulenovića.

Obrazloženje:

Molim da se postavi branik na mjestu iznad dječijeg igrališta prema Rosuljama I, preciznije ispod stambenog objekta broj 1. Na tom dijelu puta zbog velikog zavoja ili krivine, u zimskom periodu postoji opasnost prilikom kretanja vozila, jer može doći do lahkog slijetanja vozila sa kolovoza. Upravo ispod se nalazi igralište, što dodatno usložnjava problem. Molim nadležne općinske službe za dalji postupak, a fotografije dostavljam u prilogu.

Vijećnik **Gluhović Alija (u ime Kluba vijećnika Naprijed BiH)** pokrenuo je slijedeće inicijative:

12/7. Pokrećem inicijativu da se hitno u dijelu ceste Barica-Hotonj, kod nadvožnjaka, a do rekonstrukcije nadvožnjaka obezbijedi dodatna signalizacija pri prelasku ceste djece OŠ „Izet Šabić“.

- Signalizacija za usporavanje vožnje 
- Prelazak preko pješačkoG prelaza i jače osvjetljenje ispod podvožnjaka.

Obrazloženje:

Obzirom da se pješački prelaz nalazi na magistralnom putu i da je isti slabo vidljiv, posebno noću, što otežava vozačima i pješacima i ugrožava njihovu sigurnost, potrebno je hitno postavljanje dodatne signalizacije i upozorenja, posebno jer se radi o pješačkom prelazu koji koriste djeca za odlazak u školu. Posebno želim da naglasim da je ovaj problem izražen tokom snježnih padavina, kao i da se prilaz ovom pješačkom prelazu očisti.

Vijećnik **Bogilović Enis (u ime Kluba vijećnika NiP)** pokrenuo je slijedeću inicijativu:

12/8. Kada će MZ Kobilja Glava imati svog sekretara, obzirom da već dugi niz godina ova Mjesna zajednica nema svog sekretara.

Vijećnica **Šabić Dalia (u ime Kluba vijećnika DF)** pokrenula je slijedeće inicijative:

12/9. Pokrećem inicijativu za uspostavu mentorskog programa za mlade poduzetnike i inovativne ideje.

Obrazloženje:

Pokrećem inicijativu za uspostavu formalnog mentorskog programa u Općini Vogošća, namijenjenog mladim ljudima koji pokreću svoj biznis ili razvijaju poslovnu ideju. Mladi poduzetnici često imaju ideje i motivaciju, ali im nedostaje iskustvo, profesionalno usmjeravanje i pristup kontaktima. Upravo mentori - iskusni privrednici, profesori, ekonomisti, finansijski stručnjaci i drugi profesionalci - mogu značajno doprinijeti njihovom uspjehu. Program mentorstva je jedan od najefikasnijih oblika podrške mladim inovatorima. Prijedlog rješenja:

1. Općina uspostavlja program "One-to-One mentorstvo", u kojem svaki mladi poduzetnik dobija svog mentora.
2. Mentor može biti uspješni privrednik, stručnjak iz odgovarajućeg sektora, profesor ili iskusni profesionalac.
3. Mentor prati razvoj ideje ili biznisa minimalno 12 mjeseci, kroz savjetovanje, pomoć u planiranju, marketingu, pravnim koracima i povezivanju sa relevantnim partnerima.
4. Općina vodi javni poziv za izbor mentora, te formira službeni registar dostupnih mentora.
5. Mladi učesnici mogu se prijaviti tokom cijele godine.
6. Program se povezuje sa postojećim grantovima i podrškom za mlade poduzetnike radi stvaranja jedinstvenog sistema podrške.

Cilj inicijative je naravno osnažiti mlade koji pokreću vlastiti posao, povećati stopu uspješnosti start-upova i stvoriti lokalnu mrežu znanja i iskustava koja ostaje u zajednici.

12/10. Pokrećem inicijativu za sanaciju i uređenje oštećenih tačaka na stadionu "Hakija Mršo".

Obrazloženje:

U ime građana i korisnika sportskog kompleksa stadion „Hakija Mršo“, pokrećem inicijativu za hitnu sanaciju više opasnih tačaka na ovom prostoru, koje predstavljaju rizik posebno za djecu i omladinu koja svakodnevno boravi na terenu. Na osnovu zaprimljenih fotografija i informacija sa terena, potrebno je:

1. Postaviti odgovarajući poklopac na šaht, na kojem se trenutno nalazi improvizirana paleta, kako bi se spriječila opasnost od propadanja djece ili prolaznika.
2. Sanirati i zavariti dio ograde na ulazu na tribine, kod velike kapije sa bočne strane tribina, gdje je ograda trenutno oštećena i predstavlja sigurnosni rizik.
3. Postaviti jedan stepenik na ulazu na tribine, također kod navedene kapije sa bočne strane, kako bi se omogućio siguran i stabilan pristup tribinama.

Vijećnica **Curić Samira (u ime Kluba vijećnika SDP)** pokrenula je slijedeće inicijative:

- 12/11.** Polazeći od odredbi Zakona o socijalnoj zaštiti, te uvažavajući činjenicu da su djeca bez odgovarajuće roditeljske brige i štice Centra za socijalni rad jedna od najranjivijih kategorija u našem društvu, pokrećem inicijativu da Općina Vogošća uspostavi program insitucionalne pomoći djece i mladih koji su štice Centra za socijalni rad Vogošća, po uzoru na praksu drugih općina u Kantonu Sarajevo i šire.

Obrazloženje:

Djeci bez adekvatne roditeljske brige ili u stanju socijalne potrebe potrebna je institucionalna podrška koja će im omogućiti nesmetan nastavak školovanja, profesionalni razvoj i uspješniju integraciju u društvo. U više općina u Kantonu Sarajevo i drugim dijelovima BiH već postoje posebne stipendije za djecu iz socijalno ugroženih kategorija, uključujući i štice Centra za socijalni rad. Ovakva praksa pokazala je značajne pozitivne efekte u pogledu sprečavanja napuštanja školovanja, jačanja motivacije i ukupnog poboljšanja kvaliteta života korisnika. Uvođenjem ovakvog programa, Općina Vogošća bi:

- pružila konkretnu podršku jednoj od najosjetljivijih grupa mladih,
- osigurala bolje obrazovne i životne uslove,
- doprinijela socijalnoj inkluziji i smanjenju rizika od siromaštva,
- uskladila se s pozitivnim primjerima dobre prakse drugih lokalnih zajednica.

Predlažem da nadležna općinska služba izradi model stipendiranja koji bi definisao kriterije, iznos i dinamiku isplate stipendija, te da isti bude uključen u budžetsko planiranje za naredni period. Molim da se ova inicijativa uputi nadležnim službama na razmatranje i dalje postupanje.

- 12/12.** Pokrećem inicijativu za sanaciju i modernizaciju dječijeg igrališta na Blagovcu, ispred prostorija Mjesne zajednice.

Obrazloženje:

Dječije igralište koje se nalazi na navedenoj lokaciji trenutno je u dotrajalom stanju i predstavlja potencijalnu opasnost za djecu i ostale korisnike. Koševi za košarku su oštećeni i potrebno ih je u potpunosti zamijeniti. Također, dio zaštitne ograde je deformiran i neadekvatan, zbog čega je hitno potrebna njena popravka ili zamjena. S obzirom na to da se ovo igralište svakodnevno koristi, te da je jedini takav sadržaj u neposrednoj blizini mjesne zajednice, nužno je osigurati sigurno i funkcionalno okruženje za djecu i mlade. Prijedlog mjera:

1. Pokrenuti postupak hitne procjene stanja opreme na igralištu.
2. Zamijeniti dotrajale koševe za košarku novim, sigurnim i certificiranim modelima.
3. Izvršiti popravak ili potpunu zamjenu oštećene zaštitne ograde.
4. Po potrebi planirati dodatna ulaganja u modernizaciju igrališta.

Molim nadležne službe da u skladu sa svojim ovlastima i mogućnostima poduzmu navedene aktivnosti u što kraćem roku.

Vijećnik **Mehić Almedin (u ime Kluba vijećnika SDA)** pokrenuo je slijedeće inicijative:

- 12/13.** Pokrećem inicijativu da se pokrene izgradnja produženog boravka pri objektu OŠ „Mirsad Prnjavorac“.

Obrazloženje:

U OŠ „Mirsad Prnjavorac“ svake se godine znatno povećava broj novoupisanih učenika, kao i u OŠ „Zahid Baručija“ što je nama svima za ponos. Također i u ovom slučaju, potrebe za infrastrukturnim objektima namjenjenim za djecu u velikoj su potrebi. Ovdje se konkretno radi o izgradnji produženog boravka za učenike OŠ „Mirsad Prnjavorac“. Roditelji imaju

problem sa nedostatkom objekata ovakvog i sličnog tipa na području naše općine, a naravno i radi finansijskog statusa, jer je pri školama povoljnija cijena. Pozivam Vladu Kantona Sarajevo i nadležno ministarstvo da podrže ovaj prijedlog i krenu sa rješenjem ovog dugogodišnjeg problema građana naše općine.

- 12/14.** Pokrećem inicijativu da se pokrene izgradnja sportske dvorane sa pratećim sadržajem uz objekat OŠ „Zahid Baručija“.

Obrazloženje:

U OŠ „Zahid Baručija“ svake se godine znatno povećava broj novoupisanih učenika, što je nama svima za ponos. Rijetko koja općina ima ovakav trend povećanja broja stanovnika iz godine u godinu. Takvim porastom stanovništva, paralelno rastu i veće potrebe za infrastrukturnim objektima. Ovdje se konkretno radi o izgradnji sportske dvorane sa gabaritima koji ispunjavaju sve standarde za odigravanje i održavanje takmičarskih i drugih manifestacija. Trenutno učenici OŠ „Zahid Baručija“ časove tjelesnog odgoja održavaju u resursima sportske dvorane „Amel Bečković“.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

- 12/15.** Pokrećem inicijativu da se svi stipendisti - učenici i studenti koje stipendiramo iz budžetskih sredstava Općine Vogošća obavežu za aktivno učešće u manifestacijama, događajima i aktivnostima od značaja za lokalnu zajednicu i to:

1. Prisustvovanje manifestacijama povodom obilježavanja važnih datuma za Bosnu i Hercegovinu i Općinu Vogošća kao što su:
 - Dan državnosti Bosne i Hercegovine
 - Dan nezavisnosti Bosne i Hercegovine
 - Dan Općine Vogošća, te drugi događaji od značaja koje Općina organizuje ili podržava.
2. Učešće u društveno korisnom radu - u saradnji sa Službom civilne zaštite Općine Vogošća:
 - sudjelovanje u akcijama čišćenja i uređenja Općine,
 - uključivanje u druge aktivnosti koje doprinose razvoju svijesti kod mladih o važnosti volonterizma, društvene odgovornosti i brige o zajednici, npr. saradnja sa Centrom za zdravo starenje,
 - realizacija najmanje jedne takve aktivnosti tokom godine.

Ova inicijativa ima za cilj jačanje veza između mladih i lokalne zajednice, poticanje društveno odgovornog ponašanja, te afirmaciju vrijednosti volontiranja, patriotizma i aktivnog građanstva. Smatram da učenici i studenti koji primaju stipendije iz Budžeta Općine Vogošća trebaju biti primjer društvenog angažmana i aktivni učesnici u razvoju naše zajednice.

- 12/16.** Pokrećem inicijativu i predlažem da Općinsko vijeće Vogošća uputi zvaničan dopis kompaniji Bingo Import Export Tuzla d.o.o. sa zahtjevom da se omogući rad dječije igraone i restorana NEDJELJOM u sklopu Tržnog centra Bingo Vogošća, na adresi Ugorsko bb. Razlozi za ovu inicijativu su sljedeći:

1. Veliki broj građana, posebno roditelja sa malom djecom, izražava želju da svoje slobodno vrijeme vikendom provodi u prostoru koji nudi mogućnost objedovanja i sigurnu, namjenski uređenu igraonicu za djecu.
2. Tržni centar Bingo Vogošća posjeduje sadržaje koji su posebno pogodni za porodice, ali njihovo nefunkcionisanje nedjeljom značajno ograničava ponudu aktivnosti za građane tokom dana koji je najčešće rezervisan za porodično druženje.
3. Građanima Vogošće, kao i potencijalnim posjetiocima i turistima, potrebna je šira ponuda prostora za relaksaciju, zabavu i kvalitetno provođenje vremena, što bi dodatno doprinijelo razvijanju društvenog života u lokalnoj zajednici.
4. Omogućavanje rada ovih sadržaja nedjeljom pozitivno bi uticalo na socijalno okruženje, povećalo kvalitet života porodica u Vogošći i obogatilo turističko - uslužnu ponudu Općine.

Cilj ove inicijative je omogućavanje zajedničkog, kvalitetnog i sadržajnog provođenja slobodnog vremena za porodice u Vogošći, kao i unapređenje uslužnih kapaciteta naše lokalne zajednice.

Vijećnik **Pašić Edin (u ime Kluba vijećnika SDA)** pokrenuo je slijedeću inicijativu:

- 12/17.** Na zahtjev određenog broja vogošćanskih poljoprivrednika pokrećem inicijativu da Općina Vogošća u narednom periodu organizuje stručno predavanje ili radionicu za lokalne poljoprivrednike, u saradnji s relevantnim fakultetima, poljoprivrednim institutima ili stručnjacima iz oblasti agrobiznisa. Na ovaj način poljoprivrednicima bismo omogućili pristup najnovijim znanjima, tehnologijama i praksama iz agrara, uz niske troškove, a sa značajnim koristima za unapređenje njihove proizvodnje.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

- 12/18.** Pokrećem inicijativu za pokretanje procesa certifikacije Općine Vogošća za stjecanje BFC (Business Friendly Certificate) certifikata.

Obrazloženje:

Certifikacija jedinica lokalne samouprave prema BFC standardu podrazumijeva ispunjavanje jasno definiranih kriterija koji potvrđuju da lokalna zajednica posjeduje administrativne, organizacione i razvojne kapacitete potrebne za pružanje kvalitetnih, efikasnih i transparentnih usluga privrednim subjektima i potencijalnim investitorima. Općine koje posjeduju BFC certifikat prepoznate su kao sredine sa povoljnim poslovnim ambijentom, što direktno doprinosi privlačenju novih investicija i stvaranju stabilnog ekonomskog okruženja. Kao dobri primjeri u Kantonu Sarajevo izdvajaju se:

- Općina Novi Grad, koja je kroz BFC standard unaprijedila administrativne procedure, ubrzala izdavanje dozvola, povećala efikasnost službi i ojačala transparentnost prema privredi
- Općina Centar, koja je također uspješno implementirala BFC kriterije, što je doprinijelo većem povjerenju investitora, boljoj komunikaciji sa poslovnom zajednicom i poboljšanju ukupnog investicionog ambijenta.

Stvaranje povoljnog poslovnog okruženja jedno je od ključnih preduslova za razvoj lokalne privrede, otvaranje novih radnih mjesta i jačanje konkurentnosti općine. U Strategiji razvoja Općine Vogošća za period 2023–2027. godina, predviđena je upravo ova aktivnost, uz jasno naznačenu indikativnu finansijsku konstrukciju:

- Iznos: 5.000,00 KM
- Izvor finansiranja: Budžet Općine Vogošća
- Period implementacije: 2023. godina

Budući da navedena strateška mjera do danas nije realizovana, pokrećem ovu inicijativu kako bi se u najkraćem mogućem roku pristupilo procesu BFC certifikacije. Time bismo ispunili preuzete obaveze iz strateških dokumenata, ali i ostvarili konkretan napredak u unapređenju poslovnog ambijenta na području općine Vogošća. Smatram da bi pokretanje ovog procesa donijelo značajan dugoročni benefit Općini, privrednim subjektima, kao i našim sugrađanima.

- 12/19.** Pokrećem inicijativu da se u naredni elaborat za rekonstrukciju i zamjenu rasvjetnih tijela uvrsti ulica Vogošćanskih odreda (od broja 12 do broja 92 – krak slijepe ulice koji vodi ka mezarju).

Obrazloženje:

Pokrećem inicijativu da se izvrši rekonstrukcija i zamjena postojećih rasvjetnih tijela u ulici Vogošćanski odreda, u dijelu od broja 12 do broja 92 – riječ je o slijepoj ulici koja vodi ka mezarju. Na navedenoj dionici veći broj rasvjetnih tijela nije u funkciji, dok preostala, zbog starosti i dotrajalosti, ne obezbjeđuju adekvatno osvjjetljenje. Zbog toga je ulica gotovo u potpunom polumraku, što stvara nesigurnost i otežava kretanje pješaka i vozila, posebno u večernjim satima. Imajući u vidu značaj zaštite sigurnosti stanovnika, njihove imovine, kao i činjenicu da ovom ulicom svakodnevno prolaze djeca, starije osobe i veliki broj mještana, smatram da je potrebno hitno pristupiti rekonstrukciji i zamjeni rasvjetnih tijela na ovoj lokaciji. Realizacija ove inicijative doprinijela bi povećanju sigurnosti, podizanju kvaliteta života stanovnika, kao i unapređenju ukupnog komunalnog standarda u našoj lokalnoj zajednici.

Vijećnik **Hadžić Nihad (u ime Kluba vijećnika SDA)** pokrenuo je slijedeću inicijativu:

12/20. Pokrećem inicijativu prema nadležnim općinskim službama da se u centralnom dijelu općine pronađe adekvatna lokacija za postavljanje kamene instalacije na kojoj bi bilo upisano ime Vogošća na pet pisama za koja s pravom možemo reći da jesu bosanska i da odražavaju karakter bosanskog jezika. Riječ je o bosanskoj glagoljici, bosančiči, arebici, te savremenoj latinici i ćirilici. Općina Vogošća bi bila prva u državi koja će svoje ime napisati na pet bosanskih pisama.

Obrazloženje:

Inicijativa je već jednom pokrenuta sa prijedlogom da se instalacija postavi na jednom od kružnih tokova u Vogošći. Nažalost, nismo dobili potrebne saglasnosti JP Ceste Federacije BiH te ista nije realizovana. Smatramo da bi bilo poželjno da se za početak pronađe adekvatna lokacija u centralnom dijelu naše općine, a nakon toga osmisli idejno rješenje, te realizuju ostale aktivnosti do konačnog postavljanja instalacije. Naša tradicija, kultura, historija i naš jezik su naše bogatstvo. Projekat bi svakako imao odjeka i kod onih koji turistički obilaze našu zemlju, upoznavajući se s ovim kulturnim aspektom, jer je kulturni raritet bosanskog jezika iz zemlje Bosne i u europskim kulturnim okvirima, ali vjerovatno i šire rijetka pojava.

Vijećnik **Piknjač Admir (u ime Kluba vijećnika NiP)** pokrenuo je slijedeću inicijativu:

12/21. Pokrećem inicijativu po zahtjevu građana MZ Hotonj, nadležnom općinskoj službi i nadležnim institucijama viših nivoa vlasti, da se postojeći (prijeratni) pristupni put k.č. 233/25 k.o. Hotonj u naselju Donji Hotonj, koji je kolski i pješački prilaz za šest porodičnih kuća, izmjesti i poveže na novoizgrađenu saobraćajnicu, koja je izgrađena u naselju Donji Hotonj, od magistralnog puta (na mjestu nekadašnjeg autobusnog stajališta) u pravcu OŠ „Izet Šabić“.

Obrazloženje:

Usvojenim Regulacionim planom za ovo naselje planirano je da se izgradnjom naprijed navedene nove saobraćajnice zatvori postojeći ulaz i izlaz od svih kuća na magistralni put, što stvara elementarnu potrebu da se ovim našim sugrađanima izgradi i obezbijedi kolska i pješačka veza na novoizgrađenu saobraćajnicu. Na pomenutoj lokaciji postoje mnoge nepravilnosti koje svakodnevno dovode do problema sugrađana i onemogućavaju zakonit i propisan pristup njihovim stambenim objektima. Primjer su uzurpacija općinskog zemljišta, nepropisno parkirana vozila, nesiguran i nepropisan izlaz i ulaz postojećeg pristupnog puta, nepostojanje odgovarajuće vertikalne i horizontalne saobraćajne signalizacije, nerješen broj parking mjesta, izmještanje vodovodnih instalacija itd. Građani na ovoj lokaciji su kako navode izostavljeni u određenim aktivnostima, koje su trebale biti realizovane na novom lokalitetu po Regulacionom planu za vrijeme izgradnje novizgrađene saobraćajnice za naselje Donji Hotonj, kako bi njihov novi pristupni put bio izgrađen paralelno sa projektom novoizgrađene saobraćajnice. Najveći razlog za pokretanje ove inicijative je taj što smatraju da se ovaj stvarni problem pristupnog puta koji je prije svega elementarna potreba i njihovo pravo, neće u skorije vrijeme riješiti, niti je u planu prioriteta komunalne infrastrukture naše općine. Zato su putem ove inicijative zamolili nadležne institucije i službe da se na bilo koji način pristupi početnim radnjama u svrhu realizacije ovog projekta na ovom lokalitetu.

UKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir